



Fundasaun Mahein (FM), 31 Agustu 2018

Komunikadu Imprensa

Polítika ba Setor Seguransa no Externa Timor-Leste nian “nota rekomendasaun ba VIII Governu Konstitusional”

Planu Estratéjiku Dezenvolvimentu Nasional (PEDN) 2011-2030, define katak objetivu dezenvolvimentu Timor-Leste maka hametin seguransa no estabilidade, no mós harii institusaun sira husi estadu direitu demokrátiku, no rekuiñese konstrusaun ba dame nu'udar prioridade hodi bele hetan objetivu sira seluk kona-bá dezenvolvimentu no promosaun bein-estár sidadaun Timor-oan sira nian. Orientasaun estratéjika hirak ne'e, refleto kestaun konjunturál ne'ebé iha relasaun ho evolusaun husi dezafiu no ameasa husi kontemporaneidade, no tuir evolusaun husi misaun sira husi forsa defeza no seguransa, inklui mós kontribuisaun ba seguransa interna no apoiu ba polítika externa Estadu nian.

Timor-Leste produs ona Lei ba Seguransa Nasional iha tinan 2010 ne'ebé hola parte iha reforma setor seguransa nian. Nune'e Lei Seguransa Nasional 2010 hatudu ona dalan oinsa Governu bele formula Polítika Seguransa Nasional maibe to'o agora seidauk formula. Asuntu sira nune'e FM foti bebeik ona iha tempu sira liu ba hodi konsidera iha programa no planu asaun Governu nian. Maibe nafatin la temi ka tau iha Programa VIII Governu nian. Polítika Seguransa Nasional importante ba Timor-Leste hodi define koordenasaun sistema segursana nasional iha ambitu koordenasaun defeza external no seguransa interna. Hatan ba ameasa no risku sira ne'ebe Estadu hasoru liu husi Sistema Integradu Seguransa Nasional (SISN) ne'ebé regula ona iha Lei N.º 2/2010 Lei Seguransa Nasional.

Iha Setor Defeza nian, polítika ambisiozu ida ne'ebé públika iha tinan 2007 bolu naran Estudu Forsa 2020, iha ne'ebé estudu ne'e formula ona vizaun estratéjiku no planu dezenvolvimentu Forsa Defeza ka F-FDTL nian. Maibe planu ambisiozu ida ne'e nia kontiudu balu la iha ona nia relevansia tuir mudansa estratéjiku iha rejiaun no mundu. Portantu mehi ne'ebé ass maibe kapasidade finansiamentu la to'o hodi sustenta. Iha relatóriu ne'e FM rekomenda katak Governu prezisa halo revizaun ba Estudu Forsa 2020. Nune'e mos Programa VIII Governu nian iha ambisaun boot ida hodi promove Militar Obrigatoriu maibe la klaru ambisaun ida ne'e atu hatan ba saida no oinsa bele implementa. Maske nune'e, bainhira VIII Governu hakarak promove ambisaun ida ne'e prezisa iha uluk Polítika Seguransa Nasional no Polítika Defeza Nasional hodi asegura ninia implementasaun. Portantu Polítika Defeza Nasional importante ba Timor-Leste hodi define interese estratéjika ba Timor-Leste iha ambitu defeza nasional nian. Kompriende ambiente estratéjika defeza nian no análiza ameasa no risku sira, no halo objetivu klaru ba F-FDTL hasoru ameasa no risku sira ne'e.

Timor-Leste prezisa mos define Polítika Externa ida klaru no abrajante. Portantu Polítika Externa define interese nasional Timor-Leste nian maka saida no promove

no proteje interese nasional Timor-Leste nian no se maka Timor-Leste bele relasaun diplomatiku. Polítika Externa mos tenke liga ho polítika defeza no seguransa nune'e mos ba ekonomia, sosial no seluk-seluk tan. Iha tempu hanesan Timor-Leste iha ambisaun maka'as tama lalais ba ASEAN no prosesu adezaun ne'e liu ona etapa oin-oin no involve peritu oin-oin no husi ASEAN rasik hodi halo análiza ba preparasaun Timor-Leste nian maibe to'o agora seidak iha desizaun final lolos. Nune'e mos ambisaun seluk Timor-Leste prepara adere ba Commonwealth.

Ikus liu, Konseitu Estratéjiku Defeza no Seguransa Nasional (KEDSN). VIII Governu Konstitusional orgullu maka'as ho KEDSN hanesan alkansa ida iha polítika setor seguransa nian no hanesan polítika orientador ida maibe namlele hela no klaru atu hatan ba saida. Nune'e ninia implementasaun sei desorientadu. Portantu objetivu husi KEDSN maka atu estabelese aspetu fundamentais sira estratejia global ne'ebé adopta husi Estadu. Hodi komprimenta ba objetivu sira Polítika Seguransa no Defeza Nasional nian. Polítika Siguransa Nasional identifika interese sira primordial Estadu nian no husi ne'e difine Polítika Defeza Nasional determina saida maka atu halo hodi asegura interese sira Estadu nian. Iha ambitu ida ne'e, KEDSN determina medida ka liña orientador oinsa atu implementa polítika sira ne'e. Maibe to'o agora Timor-Leste seidak iha Polítika Seguransa Nasional no Polítika Defeza Nasional.

Rekomendasaun

1. Rekomenda ba Ministéru Defeza, Ministériu Interior, Ministériu Negosiu Estranjeiru no Kooperasaun tau iha planu orsamentu kona-bá formulasaun planu estratéjiku setor seguransa nian hanesan Polítika Seguransa Nasional, Polítika Defeza Nasional, no mos elaborasaun ba Polítika Externa Timor-Leste nian.
2. Rekomenda mos ba Primeiru-Ministru atu estabelese Grupo Traballu husi Ministériu Negosiu Estranjeiru no Kooperasaun, Ministériu Defeza no Ministériu Interior hodi koordena no elabora polítika sira ne'ebé temi iha leten ne'e.
3. VIII Governu Konstitusional partikularmente Ministériu Defeza no Ministériu Interior hahu diskute ona kona-bá Polítika Seguransa no Defeza Nasional atu bele iha koerensia ho Konseitu Estratéjiku Defeza no Seguransa Nasional.

Atu hetan informasaun kle'an liu kona-bá asuntu ne'e bele kontaktu:

Nélson Belo

Diretor Ezekutivu

Email: direktor.mahein@gmail.com

Telemovel: (+670) 7831 6075 ka 7756 1184

Website: www.fundasaunmahein.org